

হাকর বিছিংনি নখারবাইছিদি (গুহার গহ্বর থেকে বেরিয়ে পড়ো)

নগেন্দ্র জমাতিয়া



হাকর বিছিংনি নখারবাইছিদি

(গুহার গহ্বর থেকে বেরিয়ে পড়ো)

নগেন্দ্র জমাতিয়া

উপজাতি গবেষণা ও সাংস্কৃতিক কেন্দ্র
ত্রিপুরা সরকার
আগরতলা

হাকর বিছিংনি নখারবাইছিদি
(গুহার গহুর থেকে বেরিয়ে পড়ো)
নগেন্দ্র জমাতিয়া

প্রকাশক :

উপজাতি গবেষণা ও সাংস্কৃতিক কেন্দ্র

ত্রিপুরা সরকার

প্রকাশক কর্তৃক সর্বস্বত্ব সংরক্ষিত।

প্রথম সংস্করণ : জুন, ২০০১ ইং

দ্বিতীয় সংস্করণ : এপ্রিল, ২০১৭ইং

মুদ্রণে : ক্যান্টন প্রিন্টার্স, আগরতলা ত্রিপুরা

দূরভাষ (২৩০-৭৫০০, ৯৪৩৬১২১১০৯)

ই-মেল : jraksharpub@gmail.com

প্রচ্ছদ

মনোজ ঘোষ

দাম : ৬০.০০ টাকা

প্রকাশকের কথা

শ্রী নগেন্দ্র জমতিয়া ত্রিপুরার জাতি-উপজাতি সমাজে একজন বিশেষ পরিচিত ব্যক্তিত্ব। তাঁর লেখা বহু বইয়ের মধ্যে বর্তমান বইয়ের বিষয়টি একটু আলাদা। শতাব্দী অতীত কাল থেকে উপজাতি সমাজে এবং তাদের আর্থ - সামাজিক অবস্থানে নানা ধরনের কুসংস্কার বিরাজমান, যা তাদের চিন্তা চেতনাকে অনেক ক্ষেত্রেই পিছিয়ে দিচ্ছে।

“হাকর বিছিংনি নখারবাইছিদি” বইখানি বিশেষভাবে রচিত একটি যাত্রাপালা, যা ত্রিপুরার উপজাতি সমাজকে বিজ্ঞানসন্মত ও আধুনিক চিন্তা চেতনায় জাগ্রত করার জন্য বিশেষ ভূমিকা পালন করবে বলে মনে হয়।

প্রথম সংস্করণ শেষ হয়ে যাওয়ায় দ্বিতীয় সংস্করণ মুদ্রণের উদ্যোগ নেওয়া হল। আশা রাখি এই সংস্করণটিও সুধী পাঠক সমাজে সমাদৃত হবে।



সুনীল দেববর্মা

অধিকর্তা

আগরতলা, ১লা এপ্রিল, ২০১৭ইং

উপজাতি গবেষণা ও সাংস্কৃতিক কেন্দ্র

বুথুকা

মীচাং নগেন্দ্র জমতিয়াবাই ছুইজাক গাঁইপালা 'লাং লাং হাফার' অংখা তাং ছা
কেরেং কথমা। উপনিষদনি ছীনাংমছাজাক কক। 'মীনাংকমানি লাং লাং হাফারঅ তাঁইদি'
(তমসো মা জ্যোতির্গময়) ন' রাঁগীয় ই পালা ছুইজাকখা হায় মাতংগী।

ই রাজানি ছংদুক দফারগ রাঁংখানি তাবুকবু বেলাই ওনকলগঅ তংখু।
আয়াং চিনি আরি মিজোরাম হিনকে বেবাক ভারত বিছিংছে কীনাঁই আচকথাইঅ
ছগাঁইখা। আবঅ চিনিখানি লাচিমাছিংছা ককয়াদে?

ইংরেজী ১৯০১ বিছিঅ তিপ্রা হানি বরক সোমেন ঠাকুর য়েফুরু আমেরিকা
হাভার্ড ইউনিভার্সিটিনি এম এ পাশ খাইঅ, আজরা মিজোরগ বরক বস্ত্র শিকার
খায়লাই তংলাইঅ। বিছিরা-চিক্রই রময় ১৮৪ জনা রাজাচাওই থাংলায়বু তিপ্রাদফারগ
রাঁংয়া তংমানি বেলাই খানাংমা কক। রাঁংমাং অংখা বাঁছকাং হিমজাকনাঁই লামা, রাঁংয়া
অংখা বুইবাই বানদেজাকমা তেই ওনকলক হিনমা লামা। কীচাম কছক কুছুম তং
মাঁচামাঁংরগবু রাঁংয়া হাফায়অ বছর ছও। রাঁংয়া ছংদুকরগন রাঁংরানাবাগয়নু ১৯৪৫
বিছিঅ জনশিক্ষা ছংছাজাগী। মীচাং জমতিয়ানি ই লেখাবু অ নাহরমুং তাঁইওইনু।

ই পালানি হালকরগন' ওয়ানছকনা কুতুকফানু নাহরমুং কতর। জতঅ
ককবরক ছুইনাই খায়নাইরগ বরগনি ছুইলাইখানি রাঁংয়ারগ'ন' রাঁংরনা নাহরমুং
তাঁইখে ছংদুকরগ দাকতি আগগয় মানু। জতনু খা-থানছা অংগয় হিনলাই মানখে
বিছি নুইচি এবা নুইচিবা বিছিং চুংবু লাং লাং হাফারঅ ছগাঁইমানু। 'লাং লাং হাফার'
গাঁইপালা চুংন লামা ফুনুকথুন।

ছুইনাইনি কক

আং চেরাইফাংনিছিমি গাঁই মীছামাং নুগাঁই ফায়ওইবু ছালছাছাঁক গাঁইপালা
ছুইনাই হিনয় ওয়ানছকমা কীরাঁই। ছানা থাংখে ই-পালাবু ছুইনা মুচুংগাঁই ছুইমানি
কীলাইছকয়া। ছুইনা নাংগয় মাছুইমানিছে। তামহিনবা, চিনি হদাবিছিং নাংয়া নাংয়ানি
কীচাম কুছুম পুইতু চামীংরগ যেছুকখে চুংন মনগাঁই তংবাইখা, আবনি বিরুদ্ধে
কীরাকখে বাচানা নাংগয় তংলাইখা।

ই পালান' পুইলা কথমা হাইখে ছুইনা নাইমানি। হিমবা, গাঁইপালা হাইতুই
কথমারগ কুবুক অংমানয়া হিনয় চংগয় ই পালান' ছুইগী। পালা ছুইথানি,
ককথাইরগ তাইবু হামনা তংমানি। তাইবু খীনাথতক অংনা তংমানি। হিমবা, আবঅ
খাইনা মুচুংগাঁইবু চুকজালিয়া। তব'অ, আনি ই পালা বিছিংতাই আংহদানি বরকরগন
ছিছারিনা নাইখা। তামাহিনবা, হদানি বেংছীনাংলরগন' ছকমলছকনা থাংখে হদানি
বরকরগন' ছিছারিনা নাংগ্রাঅ।

আওলি ২৮/০৬/২০০১ইং

নগেন্দ্র জমাতিয়া

বাকছা

কুমিল্লাইন হাথি চালাইওই দলছা বরক কিফিলগই তংলাইও। ও দলঅ তংগ বুয়া বুরি, চাক্রাতেতে হিকছনুই তেই বরগনি বাছা চালা মাছা অমর চি নুই। বুয়া-বুরি, চেরাই, বুয়া-বুয়া রেমখে হিমলাইঅ। বীরাইরগনি কতকঅ মালা তাংবা তাংদক, ইয়াকতাগঅ বলয়া, ছাগঅ রিগনাই রিছা। চেরাইনি কতগ মিছিরকাতা, খুনজুঅ বিরি কংছা বেরজাক তেই কংছা নুংজাক। চেরাইনি বাদে জতনু লাস্সা হরজাকমাং। লাস্সা কীপীলাং মানাই খুনাই। বীরাই কীর্নাইরগনি ইয়াগঅ লাথা চীলারগনি ইয়াগঅ দাবরক। বুড়ি দাবা- নুংতে নুংতে ফাইঅ।

বরগ হাফাইখা —

- বুরি — (ইয়াকুং রজং খুওই কক করজাকতেখা) ওই ওলানি ছীকাং থাং।
বুয়া — তামঅ লামা নাইওই হিময়াদে। লাস্সাদে খুত্রজাকথা?
বুরি — খুত্রজাকায়! ইয়াকনি দাবা-মুতিছে ওরিই থংখা।
বুয়া — ‘ওলেই, দওই তংফুরুছি। নন’ লগে তুইখেই আহাই।’
বুরি — মীনাকমানি নুকয়া। অজয়ইছি ইয়প্রি মাছেও। বফুরজানি তাঁইছা লাইওই হাচুগঅ কাছাইছি। (নাইতুকতীতাই) দ’ নাইতুকবাইগ্রাদি। ইকঅ দাবালে মানখা। মুতিখে বিয়াং থাংখাজানি। (জতনু পজা বেরাই নাইতুকলাইখা।)
বুয়া — ‘ওলেইদমুতি।’ হিনয় তিছাখে চেরাইছা হিনতেখা আব’ বা চুচুবুমাইবিখিছে।’
বুরি — ওমলে মুতিয়াদে?
বুয়া — অব’বা আনি ইয়াকছাইমাছে। ইয়াকারদি দাকতি।
চেরাই — ইকঅ নানানি ইয়াকুং তলাঅছে মুতি।
বুরি — চেরাইনি মকাল হিনামাবা জুদানুনিয়াদে।
চেরাইনি বুয়া— কাকা, দুমাবু নুংতাই, লগেছং নাইছিংতুই বাখাকলাইগ্রাছিনুদে।
বুয়া — ‘দ’ হিনকে।

(জতনু আচকলাইখা । চেরাইনি বুমা দুমা ছীগাঁই নুংখা । চেরাইছা বুমানি
লাঙ্গা খুৎখে বুমা লাথা হারাই রুকফেরেখা । চেরাই বুমানি গানারঅ
খাইচিগাঁই ফাইখা ।)

বুরা — ‘আচু, কুমিল্লা হাথিঅ নুং তামরগন’ নাইথগজাকথা ?

চেরাই — গারী বাই দালামরগ ।

চেরাইনি মা — ‘আ নক খুংছা কলকমানবা তামনি নক অংখা হিনঅ ?

বুরা — ‘আবনু ছারৌনক । চেরাইরগ লেখা পরা খাইমানি নক ।

বুরি — আংলে বেরমান ফালনাইন ছি বেলাইখে কীমাছিও । তামানি আছীক
খছাইবা লকখাজনি । হ’রবাই ছকখে ছিদা খামচুরু খামতাই খানখা ।

চেরাইনি বুমা — গারি চালকনাইবু ওহাইনুরা কাকী । ছেংখারী লকমানি আমি আকীরান
বালতাই ।

বুরা — তামঅ বগলাছংবা আছীক লেরলাই তংলাইখা । ইয়াংলে লামা
কলকমানখু ।

চেরাইনি বুফা — লামাদে কর’লাই তংলাইখাজনি ।

চেরাই — চুচু, চিনি কামি বাছীক চালখু ?

বুরা — চিনি কামি অরঅদেবা । খীনা হরঅছি ছগাঁইলাইনাই । তিনি হাদুক কলক
কামিঅছে নগরাই কাছাই থুলাইনাইখু ।

বুরি — লামা চালখু । মীনাকখে থুথুক-থাথাক হিময় মানয়া । তেই মীছা মাংয়ুংনবু
কিরিথাই । থ’ ছাকছি তিছালাইছিনু । (জতঅ বাচালইখা । আজরা বগলা
বাই বিনি বিহিক হাফাইলাইখা ।)

চেরাইনি বুফা — ওলেইদ’ ছকফাইলাইজাখা বুয়াইছং ।

বগলা — বরঅনি দাছং । তাইছা তকছানিছে তকখীলাই থাংলাইখেবা লীংকা
ছকলাই তং লাইখায়াদে ।

বুরা — হিনকে বাহাই কিফি লায়খাছা ?

বগলা — তলাঅ কালজাংরগানি বারাই নুওইখে রমইমানখা তা হিনঅ ।

বগলজীক — ছীলানা দলাইমা রাংমা কীখাছি ফাইছিঅ। সত্য সত্য তেই কুমিল্লা
হাথিঅ ফায়লিয়া হিনয় ছেমাইছুদু মাতাংখা।

বুরি — ছাল থাংগ'। হিমলাইবাইছিनु।

জতনু — হিমদি থ।

বগলা — দাছং, কাকা-কাকীছং জতনু চিনি নগঅ বাখাকলাইনাই। থগঅ থকয়া
চালাই থুলাইনাই।

বগলাজীক — আও, লগেখে ফায় লাইমানবা।

বুরা — চাও।

খাংলাইখ।

নুই

হাদুক কলক কামিনি চকদিরি নক। চকদিরি বাই বিহিক হালাইখা।

চকদিরি — ছাজীকলে বিয়াং, তামঅ নুকয়া।

বিহিক — লুঁমানি লাইতগাঁই থুইয়াঁঅ রকই তংখা।

চকদিরি — হিনকে, অচাইন' থিকানা নাইরনা খায় নাবা।

বিহিক — নাইরখা। থুনাইরক-বনিরগ নুকজাও।

চকদিরি — তাঁমারগ নাংনাই হিনজাকখা?

বিহিক — তেই তামঅ, ফারুক জরনাই ছানজাগী।

চকদিরি — হিনকে, খীনানু ছামীং রিখে তামঅ অং?

বিহিক — ফারুকলে? আনি আরাকখে জুগালজাকনু।

চকদিরি — আংবু তাবুকনু বগলছংনি আরঅ ফারুক নাইমানু।

বিহিক — হিনকে, অচাইন' কবগাঁইমানছি চাছিঅ। ইকঅ, ফারুক নাইনা তা করঅদি।

চকদিরি — করয়া। ইকঅ তাবুকছি লাম রিখা।

থাংলাইখা

থাম

অচাই হাফাইখা। বিনি ইয়াগঅ দাবরক তেই লতা থুংছা।

অচাই — অ-খিগলা-খিগলা, অ-খিগলা-খিগলা। (খিগলা 'অই' হিনয় হাফাইখা।
বিনি ফাইমঅকঅ গামছা কাংছা। বিনি বুচুক বাইছাঅ আরাক বতল
থাইছা-তেই বাইছাদিগি ছুচ বুচুলোই চুছা চুজাক।)

অচাই — তামঅ তংতীতাইদে অই হিনমায়া?

খিগলা — আংবা অই হিনয় তংখায়া।

অচাই — দুর মুছুক। চিরিখকতে চিরিখকতে তত্রা কিচিগাঁই থাংখা।

খিগলা — তামঅ চামোংবা চুচ।

অচাই — নোংলে তামহিনয় চংখাবা?

খিগলা — তেই তামখ। ওয়ারু তানাই রিফাইদি আহাইয়াখেবা, বিরিচাকনি ছিং
হকুচুবাই ছিংফাইদি হিননয় হিনয় চংখাতা। আহাইয়াদে?

অচাই — বুচিখা। আবনিবাগয় নোং পোংতেয়া ছিরিং ছিরিং তেংতেঅ। ছেলের
বুরিলে ছাউবা। নোঁচাইয়াদে?

খিগলা — আচাইহিনয়বা। নোংখে ওছথা রিওই ছিং দেয়ারিনাই। আংখেবা হকুচুবাই
মাছিংনাই। তামঅ ছামোংছি ছাছিদি বুয়া শয়তান।

অচাই — দুর মুছুক। খোঁনাদি। নোং আনি লগে বারোয়া মা থাংনাই। ফারুক জরনাই।
চানাই চাংকোঁনাইচুক। ছইয়াদে তামঅ? হিনকেবা নুগুরাইন' তিলাংছিনু।

খিগলা — ছইও চুচ ছইও। বফুরুছি ছাছিদি।

অচাই — তিনি হরঅনু। খোঁনাদি, ফারুক ছকফুরু মাছা মনরুছগাঁই ছকদি। বুচি খাদে?

- খিগলা — আহাইয়া। মাংনুই মনরুনাই। মাংনুই ছামীংগ বকমানবাই চুকয়াদেবা ?
- অচাই — আবখেই লাইও। মতাইন' গছেরিনা কক বাংগ।
- খিগলা — 'নাং ছইমানবায় অংয়াদেহিন ?'
- অচাই — দুর মুছুক। তেই তা পীংদি। বাই খীনানানু। হিমদি থ; ছাল থাংছাখা।
- থাংলাইখা

ব্রহ্ম

হাথাইরাই পেট শাট কানাই চুনাই ইয়াগঅ ব্যাগ খুংছা তাইঅয় হাফাইখা।

- হাথাই — ওমছুক বলং কুথুক। ওমতুইহাই লামাতুই বাহাই বরক হিমলাই ? আংদে লামা করই তংখা জানি। তাবুক তামঅ খায়ছিনি। কিফিলানবু চালই থাংখা। তামঅ বৌছকাংগ বরকহাই। চেরাইফুরু কববরক ছামানি। পগই থাং মানহাই মাতংখা। তবঅ যে মানমাজরাতুই ছালাই নাইগ্রাছিনু।

(হাথাই নখারনা নাইখে অচাই বাই খিগলা থেপাথে মানলাইখা। অচাই 'ওমায়ুই মীতাইদে আতাইদে' হিনয় কিফিলয় খারখা। লগে লগে খিগলাবু খারখা। খারফুরু অচাইনি খরক রি চফ্রাইখা। খিগলা বলখগাই কীলাইখা।)

থাংলাইখা

হাথাই 'তাখুকরগ অ-আনি তাখুকরগ' হিনয় রিংহরতে রিংহরতে নখার লাংখা

বা

অচাই বাই খিগলা খারতে খারতে হালাইখা।

- অচাই — খিগলা, আংলে মীখাংছিমিছে নুগঅ-তেই মুংছা নুগয়া।
- খিগলা — আংলে ইয়াকুংছিমিছে নুগ চুচ।
- অচাই — 'হিনকে খারলাইমানি চাছিও। মীতাই হাময়া। মীতাই হাময়া।

নখারখা

হাথাই খারাই হাফাইখা।

হাথাই — তামঅ কীমাছিংছি। আনঅ নুগুই খারলাইমানি কারণ তামঅ? রেড ইভিয়ানরগছে আহাইখে খারলাইঅ হিনয় খীনাঅ। তামঅ অবরগবদে আহাই। তাবুক তামঅ খায়ছিনি? বিয়াং লামাতুই থাংছিনি। ওলেই ওমরগ বরগনু অংখা। অ - তাখুকরগ-অ আনি তাখুকরগ।

নখারখা

দক

অচাই বাই খিগলা খারাই হাবলাইওয়খা।

অচাই — ‘ওমায়ই, লেংখা। লেংছুকখা। তেই খারমানলিয়া। লাস্তানি মানুইরগ থিতি তুংবাইখুদে নাইলে আচু। আরাক বতলরগ কীছার বাইখাদে।

খিগলা — থিতিনু তংবাইখু। আরাক কিছা কীছারখা বারায়।

(আজরা হাথাইনি। খরাং খীনাহরজাকখা)

চুচু, তামঅ আবঅবা অ-তাখুকরগা হিনয়ছে রিংহরই ফাই তংখুয়ে।

অচাই — মীতাই হাময়া, মীতাই হাময়া। তুবুদি ছুচু বাটালাই।

(খিগলা ছুচু বাটালাই রিখা। অচাই গুরিই ছারতে ছারতে হিনখা)

তা কিরিছিদি। মুংছা খায়মানলিয়া, দ’ তাবুকলে ফায়ছিদি। (হাথাই গানারঅ ছকফাইখে অচাই তাইবু ছুচু বাটালাই ছারছকখা।)

হাথাই — ‘তাখুকরগ-হাদুখলক খামি বিয়াং?

খিগলা — চুচু হাদুখলক খামি রিয়াং হিনয়ছে ছাংগ।

অচাই — কামিনি লামা ফুনুগাই রহরদি। দাকতি।

খিগলা — চিনি কামিনি লামা আয়াং।

হাথাই — ‘থ্যাক্স য়ু। (নখারখা)

অচাই — মীখাং চিনি বরক নকছাক।

- খিগলা — ইয়াকুং মাযুং নকছাক।
- অচাই — ছুচু বাঁচীলৌই তংগাঁই তাওয়াইছা ইয়গলাইখা। হাইয়াখে কীথাংছে মনকজাকলাইখামুং।
- খিগলা — দাকতি ছামোং রওই থাংলাইমা চাছিও চুচু।
- অচাই — ‘হিমদিথ’। ছুনদুরুক্ষমানবায় ককথাইরগছি পগই থাংমানহাই অংছাখা। চকদিরিনি ছাজীকনি মুং তামছি অংখামুং? হাময়ানি মুংবছে পগই মাথাংখা।
- খিগলা — চকদিরিনি ছাজীক হিনয় রছিদি চুচু, দছি দপ্রা জরারগঅ।
- অচাই — হিমদি থ’। আবঅবা ইয়াংদে ফাইফিন জানি। ছুচু বাঁচীলৌই তিয়ার তংদি।
- খিগলা — তংগ চুচু।

নখারলাইখা

বাকনুই

ছা

চকদিরিনি নগঅ দরবার আচক লাইঅ। চকদিরি তেই কামিনি অক্কা চাক্কাংগ হাবিলাইখা।

চকদিরি — তাখুক বুখুকরগ! মিয়া চিনি কামিঅ বরক কৌতাল খরকছা ছকফাই অ।
নুবু নুফলাইমা কৌরাই - ছিবু ছিনি লাইমা কৌরাই। ই কক খগাঁই তং জাকনাইয়া। কামিনি জতঅ ছিলাইনা নাংলাইঅ। তেই তামঅ খীলাইথাই আবঅবু ছালাইনা নাংগ। নরগ বরগ কামিনি চকদিরি হিনয় চংলাইমানবায় আংখে ইয়াচাগয় মানাগ্রাখা।

আরাক কেফেক খরকছা — ‘রীখীলাই বহরাদি - তাবকনু।

তেই খরকছা — আংলে যেখেইনু ছইও। হিমবা, চকদিরিনি নগঅ মা তংরিনাই।

তেই খরকছা — ‘ই বরকলে বরঅনি ফাই, বিনি দফালে তামঅ?’

চকদিরি — বিনি ককখে কাহামখে বুচিইছে মানয়া। যে বুজিই মানমাজরাতুই-ব’

কুমিল্লানি ফায়ফুন। দফাবু তিপ্রানু। ই কামিঅছে বিনি জাতিরগ তংমানি
কক। হিমবা, বুমুংরগছে কাহামখে ছাছুগয় মানয়া।

বগলা — হিনকে চকদিরি নুংনু ছালাইনাই - নুংনু কুলাইনাইবা নুংনু যে খায়মান
খায়ছিদি। লুকুরগ তামঅ হিনবাই?

জতনু — ‘আও। চামানি কক।

চকদিরি হিনকে ককবা আছুকনু। তিনি জরাতুই বাচালাই বাইগ্রাছিনু।

(থাংবাইখা)

নুই

অচাইজীক বাই হাথাই হাছম লাইফাইখা।

অচাইজীক — ‘আচকগ্রিদি। আং দুমা ছীগাঁই নাহরগ্রানা।

(নখারখা)

অচাই বাই খিগলা হালাই ফাইখা।

অচাই (ছুনদুরু জাগাঁই) — ‘খিগলা ছুচ বাঁচালাইছি কারিগ্রাদি। হামলিয়া! হামলিয়া।

খিগলা — কুবুইয়াখে তামঅ। ওলেই ছুচ বাঁচালাই।

(অচাই — মত্ৰ পরেই ছারখা। আজরা অচাইজীক হাছম ফাইখা।)

অচাইজীক — ইয়ংলা, নোং তামন’ ছারাঁই তংখাছা?

অচাই — তা পোঁদি ছারনা নাংগ। নোং ছিয়াখু নগছিংগ মৌতাই হাময়া আচগাঁই তং
মানি।

অচাইজীক — দুর কবর। ওমঅবা চিনি ফায়ুং কৌচাকলানি বাঁছাছি হিনব্রে। বনবা মৌতাই
হাময়া হিনয় তংখা।

অচাই — কৌচাকলা-নি বাঁছা? বরগবা বিছি খলপেছা ছৌকংনু খামাঅ থাংফুরু
খৌলাইথান্না।

অচাইজীক — আজরা বরগনি লগে বাঁছা চাছলকছা মাছা লগে তংয়াদেবা? ছাইজীক

মাছা তিলাংগায় থাংগ হিনয় খীনামানি। আবনু-ই চেরাই।

অচাই — অ-কুবুইদে। হিনকেবা নুংবা চিনি জাইতিছে। বাবুয়ই অ-বাবু নুং কীথাং তংজাখু। আনঅ ইয়ং রিংদি। দ' নাইথকাত্তি মা, আরাকছি বতলছা কারিগ্রাদি। বাবুবাই নুংলাইগ্রানু।

অচাইজীক — ব নুংয়া। দুমা ছুদুছে নুংয়া।

খিগলা — 'মুংলে তামবা ছাংগয় নাইখাদে নানা?

অচাইজীক — ছাংখা। তামঅ মুয়ংহিনয়ছে বুচিলে। বাবুনি মুং ফিয়া ছাই খীনারিনাবা।

হাথাই — 'আইন রিংজাকমা মুং মাউন্টেন। অছল মুং হিনকে নিকলস।

অচাই — বুচিখা। অচাই ফারমানিয়া। নিমুং ফারনাই ছাব? মায়ুংরগ তকছারগ মুং গাঁই?

হাথাই — আনঅ যে পালাইনাই আ বীরাইন' ফারঅ। হিমবা আং হাথাই ছাকা তং নাইনি বীছা হিনয় 'মাউন্টেন' রিংখা। মাউন্টেন হিনমানি অংখা-হাথাই।

খিগলা — 'তাবুকছে গীলাংছা পামাহাই মাতাংছিঅ' বুচিখা নিনি মুং হাথাই।

হাথাই — 'আং থাংগ্রাছিনু-

(থাংখা)

অচাইজীক — বুচিখাদে ইয়ংলা। ই চীলাছা কামিনি চেরাইরগন' লেখাছি ফীরীংনা হিনঅ।

অচাই — লেখা? তানানি লেখা। চেরাইরগন' ছেলের দাংদাল ছীনামনা বাগয়দে? ও চীলাছানি ককরগ খীনাথকয়া। মকল খুনজু কাইওই মাতংলাইনাই বুচিখাদে আচু।

খিগলা — বুচিখা।

অচাই — হিমছিদি থ।

(নখারতীতাই)

খিগলা — 'নিনিখলা হিনমানিবা খিগলা হিনমানিদে? আহাইবুদে মুংরগ অংগয়মান?

অচাই — ‘কবর’ ছনখলা হিনমানিছে।

খিগলা — ‘ছইনু ছাখা।

(নখারলাইখা)

থাম

বীরাই চীলা ছিকলা-ছিকলীরগ হক হকনা ফায়লাইঅ। হাথাইবু ফাইখা।

করমতি — ‘অমনু চিনি হক। ফাইদি বাইয়ারগ, চেংলাইবাইছিনা। রুচামাং মুছামাং
আইগেনি দিননি বরকরগ বলং বেরাইনাই (২)

আইগেনি দিননি বরকরগ হক হকনাইরগ (২)

আইগেনি দিননি বরকরগ মাই কাইনাইরগ (২)

করমতি — ফাইদি লেংলা লাইবাইগ্রাছিনু।

হাথাই — ‘বাইয়ারগ! নিরগন’ আং কক খাইছা ছানা মুচুণ্ড। নিরগ জতঅ ছইখে আং
ছারিক ছারিক লেখা ফীরীংমানু।

ছিকলা খরকছা — ‘লেখা পরা তামন’ হিনবা?

হাথাই — ‘লেখা ছীরীংমানি অংখা ছাকনি বুমাং ছুইনা রীংমানি তেই বই বীচাপরগ
পরিণা রীংমানি।

তেই খরকছা — আবঅ খায়ওই তামঅ অংনাই?

হাথাই — নাইদি বাইয়ারগ! মীতাই চুংন মকল রিহরখা নাইনানি তেই পরেওই
ছিনানিবাগই। পরিণা ছুইনা মানখে গিয়ান পাছাবও। গিয়ান বরকন’
ছিছারও। আবাগই কীরীং বরক হিনকে ছিছাজাকহাই, রীংয়া বরক
থুজাকহাই। নিরগ জতনু থুজাকমাং। তামাহিনবা, নরগ লেখা পরা
খাইলাইয়া। ছিছারনা বাগয় আং নিরগন’ ফীরীংনা হিনঅ।

ছিকলা খরকছা — ‘লেখা পরিণা থাংখে তামঅ তামঅ খাইনা নাংন?

হাথাই — নরগ ছিকলা থুথাইঅ ফায়বাইদি। আং বেবাক ফুনুকবাইওয়ানু।

- করমতি — হরঅ চাঁং মাই-মুই ছংগ, দাংদু তানলাইঅ, বাঁতীকরগ নুংলাইওই কুল
পাইয়া বাহাই ফায়মানাই? (বোঁরীহরগ মনুইলাইখা)
- হাথাই — দাকতি দাকতি ছামোং পাইরই ফায়মানু। তেই দাংদুরগ ছোঁরোংনা হিনকে
আ নগঅনু ছোঁরোংমানানু। তিনি হরঅ জতনু ফায়বাইদি। আং নায়ছিংগয়
তংনাই।
- করমতি — তিনি অহরঅ চিনি বাঁতীক নুংলাইবাইনাই। জতনু ফায়বাইদি।
(বোঁরীহরগ মনুইফিখা)
- হাথাই — বিনি ছোঁকাং ছোঁরাপছানি বাগয় ফায়বাইদি। আং নাইছিংগয় তংনাই।
- করমতি — হিমবাইছিদি বাইয়ারগ। হাবা ইয়াকারলাইছিলা। তামজানি আনি দেহার
তংথকয়া অংছাই ফাইখা।
- জতনু — থ' হিনকে।

থাংবাইখা।

ব্রহ্ম

অচাই বাই খিগলা হাফাইখা।

- অচাই — আনি ছেমা গথকয়া হিনকে থি-কাফেই কৌপালঅ লাথি রদি।
- খিগলা — আনি বৌছকাংগ যে ছাখা বুইনি বৌছকাংগ' তা ছাছিদি।
- অচাই — জতঅ লুকুনি বৌছকাংগ ছাইমানু।
- খিগলা — আবুখে কুকুবুইনু লাথি মাচাখা।
- অচাই — দূর মুছুক।
- খিগলা — কুবুইদে মাচায়া?
- অচাই — বাহাইখেই ছাদি।
- খিগলা — নাইদি। তাবুকজরা ওয়াইথাম ছেমা- নাইওই ছামোং রিখা। পুইলা
ফারুক জরঅ। বনিখে পুন জরঅ, বনি ওলঅ তাখুম জরঅ। হাময়ালে।
করমতিবা লাইতগাঁইছি তংফিওখা।

অচাই — তাবুকখে হামছিনাই নুং নাইদি।
 খিগলা — তাবুক নুকজাকনাই বীরাইরগ। নাংগানু কাছিং। বনিওলঅ তেই তামঅ ত?
 অচাই — তেই নাংয়া। তেই নাংয়া
 খিগলা — হাকেইবু হাময়া হিনকে?
 অচাই (জালিজাগই) — হাখেইবু হাময়া হিনকে? ইকঅ ই দাবরকবাই মাছা মাছাকে
 ছীকীমাই রিবাইনাই। কে'বন, ফিয়কয়া কেবনয়া।
 (নখারখা)

খিগলা — 'অ বুয়া তামঅ ছানা নাইখা বুচিইমানলিয়া। হিমবা, তামঅজানি আনি খা
 কীলীই ছাবখা। অ-মীতাইরগ। নরগছি ছাইমানছিনাই (থাংখা)

বাকথাম

ছা

ছিকলা থুখাই। হাথাই হাছমফাইখা। ছীরাপছা আচগাই (বেগ) বিছিংনি খাতা বাঁচাপ তেই
 কলমরগ কারিওই নাইছিং তংখা।

হাথাই — তামঅ খরকছাফা ফাইলিয়া জানি। ওমছীকত' দীকনা ককয়া?
 (খরকছা ছিকলা হাফাইখা)

হাথাই — অ' নুং খরকছা ফাইখা হাইদে?

ছিকলা — আং করমতিছংনি নগ অছি থাংনা ফাইঅ। আরঅ বাঁতীক নুংনা রিংজাও।
 (নখারখা)

(তেই কানীই ছিকলা হাফাইখা)

হাথাই — 'নরগ পরিনাদে ফায়লাইখা?

কানীইরগ — এহেন। করমতিছংনি নগঅছি বাঁতীক নুংনা লাম রিলাইঅ।

(নখারই থাংবাইখা)

হাথাই — বুচিখা! নাইছিংগয় তেই চুকলিয়া। কীমাছিংছা! বেলাই কীমাছিংছা!
 চেরাই ছিমি মা-ফা কীমাজাগাই আং চংমানি, আংহাই কীপাল হাময়া ই
 হা ছাকঅ কে'ব কীরাই হিনয়। নাইবা, আংবু ই হদাঅ তরমানি
 লকমানি হিনকে অমরগহাইনু অংখামুং। অ মীতাইরগ আং,তিনিলে
 বুচিইমানখা-আং কীপাল কাহাম - কীপাল কাহাম।

(নথারখা)

নুই

॥ চকদিরিনি নক ॥

চকদিরিজীক হাফাইখা। আচগাঁই খীতীং দুলনা পানজৈখা। আজরা
 বীরাই ছিকলীরগ হাফাইখা।

বীরাইরগ — ‘মারে করমতিলে।

চকদিরিজীক— তিনি হাবানি কিফিলখে থংগারঅ কীলাইফাইখা। তাবুকজরা বাচাই
 মানয়া। কীলাইমানি কেনথা কাংনুই কাংথাম ফিনয়বছে মাখাকমানলিয়া।
 মায়রগ! নরগ বনঅ লগে তা নাইলাইছিদি। নরগনি নরগ নুংলাইছিদি।
 নরগনি বীতীক আ মায়ানগঅ চনাই রিখা। আরঅ হাবলাই ছিদি। আংবু
 চামাইজীকছংনি আরঅ গরা নুংনা রিংজাও। নাইছিংলাই তংলাইখানা
 থাংগ্রাছিনু।

(জতনু নথারখা)

থাম

করমতি হাছম ফাইখা।

করমতি — ‘আমা - আমায়ই। তাঁই রিফাইগ্রদি। বেলাই তাঁই কাংখা। তামঅ নগঅ
 কে'ব কীরাইদে?’ (হাথাই হাছমফাইখা)

হাথাই — ওমা, করমতি! নিনি ছাকবা তুংমাছে বেলাই। দদি রকরগ্রাদি।

করমতি (রকরতীতাই)— তাঁই কাংখা। মা লে রিয়াং থাংখা জানি।

- হাথাই — নুং রকরই তংদি। আং রিফাইনাই।
(হাথাই তাঁই লওবাই নাওই তাঁই খানখা)
- হাথাই — করমতি! নুং ম্যালেরিয়া বেমারবাই মানজাকখা। ওয়াইবাইছাক ছাখা- নীং
বিথি চানা নাংনাই। তামঅ জানি নুং ছইয়া।
- করমতি — বিথি বরি চাখেই দেহারনি বেবাক ফান থাংগ। তাংনা তুই নামানয়া খাঅ।
বনিবাগয় চায়া হিনঅ।
- হাথাই — ‘ই কক নন’ ছাব ছাখা?
- করমতি — ‘মা-বাবু অত্রা চাত্রা জতনু ছাবাইও।
- হাথাই — হিনকে নুং বাহাইখে হামছি নাই?
- করমতি — অচাই ছামীং রিনা থাংগ। বীরীইরগ নুকজাকখা। কাছিংবাই ছামীং
মারিনাই।
- হাথাই — ওঃ করমতি। ছামীং ছামীং। তেই বাইছাক ছামীং রিলাইছিনাই? তবঅ
ছামীংগ’ পুইতু চাখু?
- করমতি — তেই তামঅ খায়জাকনাই তং! আনঅ খায়নাই তংও। বনিবাগায় ছামীং
রিওইবু হাময়া।
- হাথাই — ওঃ থাকছিদি করমতি! আং খীনানা মানলিয়া। খীনাতে খীনাতে খুনজুঅ
কেনদাবা হাপমানহাই অংজাকখা। তাবুক আনি কক খীনাগ্রাদি। আং
খীনা কুমিল্লাঅ থাংগাঁই বিথি নাইছিনাই। নুং কলত্রীইছিমি চাওই নাইগ্রাদি।
কিরিখে আংবু চাওই ফুনুকনাই। তেই কোন কক কারীই। আং থাংখা।
(থাংখা)
- করমতি — অ আমা-নুং রিয়াং থাংখা। আনঅ রমফাইগ্রাদি-ছীতীইনা মুচুকখা।
(থাংখা)

ব্রহ্ম

॥ চকদিরিনি নক ॥

চালা বারাই ছিকলারগ বাতীক নুংলাই ফেকলাই রৌচামীছা অংলাইখা।

বারাই কানাই — নুংদে নুংদে, নুংয়া তা তংদি নুংয়া হিনকেলে লুখালাই রনাইছে।

তেই খরকছা (তাইবু খরাং কতরখে)

মিছির কাতা চাইরানানি

মালাকীচাং দুইয়ানানি

অ-দাদা চিকন পাইরমানি।

চালারগ ছুমু ছুতেই নখারলাইখা। বারাইরগ কিরিরি কিরিরি মনুইতেওই
নখারলাইখা।

বা

॥ কুমিল্লানি বলং লামা ॥

ডাকাত খবকব্রাই হাছমফাইখা।

বাথামা — বুচিখাদে রজং। তিনি ই লামাতুই যে ফায়নাই কেবন' মা ফিয়কয়া।
মানাই রাং যে তংমা ছেকনা নাংনাই।

রজং — বুচিখা বাথামা। খরকবাজরা ছাকনাং জাকয়া। ছেঃ।

বাথামা — দাইকং বাই হকি।

দাইকং বাই হকি— তামঅ বাথামা?

বাথামা — নিরগ ই বুফাং তলাঅ তংলাইদি। রজং কেপ্পেখে নিরগ মাকীচারনাই।
ইয়াংতুই ফাইখেবা নিরগ ছাঁকাং। কেপ্পেখে রজংনি বুচিখাদে। আং নাইগুই
তংনাই। যে চুকয়া বিনি জান কীমানাই।

দাইকং বাইহকি— বুচিখা বাথামা। বরকবা তামঅ মীছা সিংহছি ইয়কমানয়া। ছেঃ।

আজরা বিধি বেগছা তাঁইওই হাথাই হাফাইখা।

ডাকাতরগ — ওলেই ছাবঅ ফাইছাখা। ফাইদি ছয়জাকলাইবাই ছিনা।

হাথাই হাফাইখামাত্র রজং কাঁবাগাঁই বিধি ছেকনা নাইখা। হাথাই ওষ্ঠা
রিওই ওরিরই রহর খা।

হাথাই — নাং ছাবঅ? তামঅ নাই?

রজং — আং ডাকাইত। নিনি ব্যাগ তেই ছলানি রাং কারিই কাঁলাংদি। হাইয়াখে
লাই থাংমানগীলাক।

হাথাই — 'কাঁলাংমানয়া। আনি ব্যাগঅ বিধি তংগু। তিনি বিছিং হাময়ান' চারইনা
নাংগ। হাইয়াখে থাইনাই। লামা ইয়াকারদি। আং দাকতি থাংনা নাংয় তংগ।

রজং — কোন কক খীনায়া। ব্যাগ রদি।

হাথাই-(জলিজাগই) — রিয়া, মানখে ছেগাঁই নাদি। (রজং বারছাই ফাইখে হাথাই লাথি
রওই ওরিরই রহরখা। হাখেই রমাই মারখে ঘুমি রিখা। ওলঅ রজং মা
গেরকখা।

(বনিওলঅ বৌছকাংগ বাচাফাইখা দাইকং 'বাই হকি। ওলঅ ফাইখা
বীথামা। বরগ কাঁথামনু চেনাই খারবাইখা। হাথাই ফিয়া লাম রিখা।)

দক

॥ চকদিরিনি নক॥

করমতি ইয়াপি ককই মকইখে হাছমফাইখা।

করমতি (রকওই) — দা-হাথাই আনি খাফাংনি তকছা। নুং বিয়াং থাংগ তংখা। আং
থুইনাইখা। থুইনাছীকাং নিনি মীখাং থাইছা নাইনা মুচুকখা।

(হাথাই হাফাইখা)

হাথাই — করমতি, করমতি নুং তামঅ ছিরিং ছিরিং।

করমতি — আং থুইনাইখা দা হাথাই।

হাথাই — থুইয়া। আং ছকফাইখা। নুং খুয়াদি। আনি বিধি চাদি। নুং হামনাই।

(করমতি খুয়াখে হাথাই বিধি তুগাঁই রিখা।)

করমতি — আং বিধি চামানি কেবন' তা ছাদি। খোনাখে নন' জলিজাকবাইনাই।

হাথাই — বনিবাগয় নোং ওয়ানছকনা নাংয়া। নোং হামগ্রাদি।

(থাংলাইখা)

বাক ক্রই

॥ বুইছুনি ছাল ॥

চকদিরি তাই কামিনি অত্রা চাক্রারগ হাছমফাইখা। চকদিরিজাঁক আরাক
বতল তুবুই হাফাইখা। জতনু নুংলাইখা।

চকদিরি — 'অ কামিনি বোঁরাই চেরাই ছিকলা ছিকলিরগ। ফাইবাইদি। মৌছাফাইবাইদি।
তিনি বুইছুনি ছাল। ছিরিছিতিনি মৌছা মুছুইখে তংথক লাইমা ছাল।
(ছিকোলা ছিকলীরগ মৌছালাইফাইখা।)

বালরে বালরে বালঅ.....

(হদা অত্রা ছকফাইখা)

অত্রা — চকদিরি নগঅদে তং?

চকদিরি — ওমায়ুই দা অত্রাছিন্না দবাইদি ইয়াকুংছি ছুবাইগ্রাদি।

(ইয়াকুং ছুজাগাঁই অত্রা আচকখা)

অত্রা — চকদিরি! আংবা বেলাই থেকেইছি মাফাইজাখান্না।

চকদিরি — বাহাই কথমা তুইয় দা অত্রা?

অত্রা — মিয়া আজামা বীরেচন্দ্র কিশোরনি চিঠি কাংছা ছকফাইও। বেলাই কক
কতর হিনঅ। আবছে পরিমানাই কে'ব কৌরাই। খোনামানি নিনি নগঅছে
মাছা কৌরাং চেলাছা তংহিনল্লে। আববা কুবুইদা?

চকদিরি — আংবা আছৌক ছাইছি মানয়াল্লে। তামহিনকে, হাথাই মুংগাঁই চালাছা মাছ
তলে তংগ। ব'বা রংগাঁইদে তং জানি। হিমবা, ওয়ারুক ছুদু চিরনা রাংয়া

ওয়ানাতে তংদি।

অক্রা — এই হিনকে ব'নু। হাথাইনুফু বিনি মুং। দ হিনকে নাহরগ্রাদি চকদিরি। আং বেলাই ওয়ানাইছি মাতংখা। আবাগয়, বুইছুনি ছামীংরগ কারীইছে মাফাইঅ।

চকদিরি — অ হাথাই। হাথাই ইয়াং ফায়গ্রাদি। দা অক্রা ছামীং নাংজাক তংগী।
(হাথাই হাফাইখা)

হাথাই — তামঅ ইয়াং। তামনিবাগয় রিংহর?

অক্রা — কুবুই কুবুই কীরীংনি মীখানুরা। নাইলে বাবু ই চিঠি পরেইদে মান?
(হাথাই চিঠি নাওই পরিখা)

হদা অক্রা,

ওজরা রাজ্যনি রাং বেলাইখে নাংগয় তংখা। বনিবাগয় নুং ছালছিনিবিছিং ঘরচুক্তি খাজনা তিছাওই রহরনা খায়দি। মানয়া মাহিনয়া। তামহিনকে, সময়লে নাইমানু তালছাজরা। আবতাই সময় নাইখে ছাকফাং মা ছাফাইনাই। হাইয়াখে চিঠিবাই মা ছাহরনাই। ছালছিনিবিছিং আবঅ মাখায়নাই। আহাইয়া হিনকে অজামা যে ছা লামা রমনাই। অজামা বীরেন্দ্র কিশোর বাহাদুরনি খুকফাং মানীই আং ই চিঠিঅ মুং ছুইখা।

থাক

দেওয়ান

স্বাধীন ত্রিপুরা।

অক্রা — নুকখাদে। ওমছুক কিরিমাছিংছা ককরগছে। ছিরুকছারাপয়া হিনকে তামছি অংখামুন! লেখা রীংয়া হিনকে আবতুইখে নু থাইঅ। তাবুক কক অংখা— তাবুক হদানি বরকরগ বুইছুনি চালাই নুংলাই তংথকলাই তংলাইমানজরা। ই তংথকমুং ছেনাজরা কীরীংগীয় তংগানু। আবঅ পাইখেছি খাজনা থুমনানি। থুমাই রিহরতে রিহরতে রমদি তালছা জরা নাংগানু। তামহিন চকদিরি?

চকদিরি — আও, তালছাজরা নাংনাই দা অক্রা।

অত্রা — হিনকে তাবুক এবা ছাকফাং থাংছিনি এবা চিঠি রহরছিনি। আবনিবাগয়বু সময় ছালছিনিছে। বাবু, নুং চিঠি ছুইদে মান? তামহিনবা বুইছুনিজরা, আং থাংনা মানয়া।

চকদিরি — চামানি কক। দ' হাথাই ছাদি। মানইবা মানয়াইবা।

হাথাই — মানু। তামঅ মানয়াবা অংনানি।

অত্রা — দ' হিনকে ছুইগীয়ছে রছিদি।

(হাথাই কাগজ কলম নাহরই ছুইফাইখা।)

অত্রা — দ' পরেই খীনারিলে।

(হাথাই পরেখা)

অজামা - ধর্মান্তর,

আং নিনি চিঠি মানুই বেলাই খা-অ তংথকজাকজাখা। আং নিনি ইয়াকুং ইয়াফাং কীলাইওই খুলুমজাও। অজামা। আং নিনি ককন' চাজাকয়া অংয়া, গছেয়াবু অংয়া। হিমবা, তাবুক বুইছ ছেনানি জরা। ছিরি ছিতিনি তংথকলাইমা-চাথকলাইমা জরা। বনিবাগ তালছাজরা সময় মানাইজাও। ছেনা পাইখে লগে লগে খলীই যে চংমা জরা জমা রিফাইনাই। খুলুমাই ই কক ছানা কইজাঅ।

নিনি ছাকলমঅ তংনাই থাক হদা অত্রা।

অত্রা — চাখা। চাছুকখা। হাথাই, বাবু ছালে নুং বীছীক জরা পরেখা?

হাথাই — এম, এ পরীক্ষা রিওই ফাইও।

আরাক কেফেক খরকছা - এম এ হিনমানিবা গুরমছ লাইজাকদে?

তেই খরকছা — লাইজাক।

অত্রা — আং হামজাকখা হাথাই। নুং বিথিছি অংছিও। খীনাবাইদি লুকুরগ, চেরাই খনাইরগ। নরগ জতনু হাথাই হাইথে লেখা পরা ছাঁরীংনা খায়বাইছিদি।

চকদিরি — হিমছিদি দা অত্রা - তাবুকলে নকছিংগ হাবলাইছিনু। (থাংলাইখা)

ছিকলা খরকছা— কুকুবুইছি দা হাথাইয়া লেখা রাঁথ্রা। ফাইদি, চুংব পরেলাইছিনা।

জতঅ ঢালা ছিকলারগ -আও। চামানি কক। (থাংলাইখা)

করমতি — ফাইবাইদি মারে, চুংব লেখা পরে লাইছি না।

তেই খরকছা — ‘আংলে রাঁথথকছি অংজাকয়া। হাইয়ে বীথা বীথা মুচুও।

করমতি — হিমদি, তাইবু লগে ছলাইগ্রানু। (থাং লাইখা)

নুই

॥ ছিকলা থুখাই ॥

ছিকলা - ছিকলি চেরাইখনাই হাছমফাইখা। কে'বা ছিলত পেনছিল কেবা খাতা কলম
তুবুলাইখা। বরগ জতঅ আচকফাইখে হাথাই হাফাইখা।

হাথাই — দ' পরেনা চেংলাইবাইছদি। বারাইরগ মুংরগ ছুইনা চেংলাইদি। চেরাইরগ
অ আ ক খ এবা ABCD পরে লাইদি।

ছীরাপছা তংখে হাথাই (বারাইরগনি ছিলেত মাথেই নাইওই হিনখা)
চাখা। চাখা।

হাথাই — ‘চেরাইরগ হিনবাইদ ছা-নুই থাম, ক্রই, বা, দক, ছিনি, চার, ছুকু, চি।
(চেরাইরগ লগেলগে হিনলাইখা)

হাথাই — ওমছুকজরাখে তিনি মীথাকগ্রাছিনু। নুং ছাব' থুই তংখা। বাচাদি।

থুনাই ছিকলা ঢালা— ইমংগ গংবাইছি খাপ্রজাওই মাতংখা।

হাথাই — ফাইদি কুরুকলাইনা ছীকাং পালখে রুচামাং তাংছা রীচাপলাইনা।
(রীচাপলাইখা)

ছিছাদি তাখুক, চিছাদি বুখুক

ছারিই ছাল থাংমা নাহরদি।

ছারিই ছাল থাংকে চুং কীমানু

ইয়াক বাই ইয়াক রমলাই হিমদি

তাখুক..... বাই ইয়াক রমলাই হিমদি।

ছিছাদি তাখুক - ছিছাদি বুখুক.....।

হাথাই — অরঅ বাখাকলাইগ্রাখা। (থাংবাইখা)

থাম

॥ তুক হাবা ॥

হাথাই বাই করমতি হাফাইখা।

করমতি — ‘ফাইদি ইয়াংছিমি হাবা চেংলাইছিনা।

হাথাই — থ’।

করমতি — তামঅ নীং থাইচুমু মফলরগ ফাইখাছা?

হাথাই — ‘আং ছিনিয়া। বেবাক জাব্রামাং হিনয়ছে তংগ। দ’ ববরগ তামঅ -
ফুনুকদি।

করমতি — ইকঅ অমঅ থাইচুমু, অমঅ মফল, অমঅ ছিপিং, অমঅখুল, অমঅথেবা
বানতা, দারমাই, অমঅ থাকুল, অমঅ চাকুমুরা, ওমঅথেবা খুনজুরুপাই।
অমঅরগন’ তা ফাইদি।

হাথাই — দ’ আকন। তাংগাঁই নাইগ্রানা।

করমতি — ইকঅ নাহরদি, আলিয়াকনা ছমছাই ফাইছাখা। হিমদি গাইরিংগ।

হাথাই — করমতি! নুং ছাইদে মান ওয়াতাই বাহাইখে ওয়া?

করমতি — ছাইমানু। ভীম ইয়াকবাই তাই ছারাই ওয়ারিঅতা। তামঅ বন’বা
ছাইমানয়া অংনানি! (হাথাই-মুনুইখা)

করমতি — তামনি মুনুইখাছা? ছই ককন বা?

হাথাই — হিনকে ছাদি। আ তাই ছারনাই ভীমনি ইয়াফা বাঁছাক ওয়ারন’?

- করমতি — বেলাই কুয়ার। রমদি, ইয়াংখুংরগবাই বাকছা।
- হাথাই — মানিখা ইয়াংখুংছৌক! হিমবা আববাই ছারাই ওয়াতাই ওয়ারিমান তাবুকহাই
হাথাই হাফুং খবাই? আবয়া। খীনাদি করমতি। নখা ছাকঅ কবনাই তং
নাই চীমাই বদলরগ কীচাংগাই তাই চাখে তলাঅ কীলাইঅ। আবনু
ওয়াতুই! ছানা থাংখে চীমাইনু ওয়াতুই। বনিবাগয়, চীমাই কুথুময় নখা
ছমছায়া হিনকে ওয়াতুই ফাইয়া। চীমাই কুথুময়ই ওয়াতাই ফাইমানদে
নুখা?
- করমতি — আবত' নুকয়া। হিমবা নিনি কক গথকমানহাই অংফানু পুইতু চাইমানয়া।
- হাথাই — নুং তাইবু নাইদি। ওয়াতাই ছারেখেই নখা ছাকানি চীমাই ছারাই থাংগাই
লাং লাং অংগী। অংগাদে?
- করমতি — আববু অংগী। তবঅ মা-ন' ছাংগাই নাইথানু।
- হাথাই — তামন' ছাংনাইছা?
- করমতি — আবনু তা। ভীমনি ইয়াফা বীছৌক ওয়ার! আং করমাহাই অংগয় তংখা।
ওমায়ুই ফাইরাংছি ককখা। হিমদি থ' গাইরিংগ। মাইচু চানাবু জরা
অংখা।
- হাথাই — আং মাইচু চায়া।
- করমতি — তামনি ছা?
- হাথাই — মাইমাং, মাইমাং। আং চাইমানয়া। লয় কীরাই।
- করমতি — হিনকে, তামন' চানাইছা?
- হাথাই — ব্রেড, বাটার, ওমলেট, কাটলেট, চপ, আবতাইরগ।
- করমতি — আবরগবা বাহাই নুকয়াখু, খীনায়াখু। হিমবা চকলে তংগ। নগঅ কিফিলখে
খানাই মানু।
- হাথাই — চপবা নুংগালে - চাছি চাঅ।
- করমতি — ওহাহাইনুতা। নরগখেবা নুংগু চাংখেবা চাঅ।

করমতি (আচমছ) — ‘নুং চায়া হিনকে আংবু চায়া’। (করমতি খারাই নখারাই থাংখা)

হাথাই — চানাই, চানাই, করমতি তা থাংদি।

হাথাই লাস্কা হরাই তেই তামঅ খায়ছি। আংনু হরাই থাংছি।

(থাংখা)

ব্রহ্ম

করমতি হাফাইখা।

করমতি — ‘তাবুকলে অরঅনিঅ হাইজাগাই তংছি।

(হাথাই লাস্কা হরাই হাফাইখে করমতি ওনকলক বাচাওই লাস্কা ছখা।

হাথাই ওনকলক ফিরগাই নাইখে করমতি হাইজাকফিখা। হাথাই

নুকলিয়া হিংফিখা। করমতি ফিয়া লাস্কা ছখে লাস্কা চগ্রাই হাঅ কীলাইখা।)

করমতি (বেলাই মুনুইখা - হাখেই হিনখা) - আনি খাফাংনি তকছা।

হাথাই — ‘তেই খুকছা হিনলে।

করমতি রীচাপখা -

অ আনি খাফাংনি তকদা।

করমতি (রীচামুং থাকখে কাপতীতাই) হিনখা —

নুং আনঅ খিবিওই তা থাংদি দা হাথাই।

কক রদি থাংয়া হিনয়।

হাথাই (করমতিনি ইয়াক রমাই হিনখা) - থাংয়া।

করমতি (মীকতাই ছতীতাই) হিমছিদি থ। লামাঅ মুইয়া ফাইওই থাংলাইছি।

(করমতি লাস্কা নানা নাইখে) হাথাই হিনখা - আংনু হরছি। হরথগী।

করমতি (মুনুইফিখা। হাখেই হিনখা) — দূর কবর। চীলারগদে লাস্কা হরাই মীচাংবা?

(করমতি লাস্কা হরাই নাখা)

হাথাই — খিগলানলে হমতিনু লাসা হরীই অচাইনি লগে থাংমা নুকরা ছা?
করমতি (নখরতীতাই বেলাই মুনুইতীতাই) নুং খিগলায়া খিগলাছে। (নখারলাইখা)

খাক বা

।। অচাইনি নক।।

অচাইজীক দুমা নুংতে নুংতে হাফাইখা।

অচাইজীক — বফুরজানি পুন হাবীই খিমানবায় ছীতাইমানবায় লীংকাখে কীলাংখা।
(নকফারতে ফারতে) লক্ষ্মীছাড়া চীলা। তীমা কীপালঅ তংগয় আংবা
ওমতাই চীলানবা ছাই হিনায় মানখাজানি। ওমায়ুই মায়ুই। অচাই তেফুন
অচাই। কুবুইদে অংখা, তাতালদে অংখা, থিকানা নাইতেহিনয় বুইনি পুন
তাখুম পাইরই তংথক চাথক তংগানি। ইয়াং নক কিচিক কীপলা
হিনকেবা নুকতেলিয়া। ইয়াংথেবু পুনানি লাঁদাক, ইয়াংথেবু ছাইনি লাঁদাক
ওমায়ুই মায়ুই। ই পুংখীনদে চাখাই ছুংগীই চারঅছিনিছিদু। থাইথে তেই
চীলা মাছ নাওই নুখুং খায়ওই নাইনা মুচুকমানি। থুবু থুইয়া ছাকাছি
কারীই কারীক।

(অচাই হাফাইখা।)

অচাই — তামনি আছীক কুতুকছাখা নাইথকতিমা। হিমবা নীং কুতুকছামান আংথে
রীচামীং খীনাটাইছি মাতংজাও।

অচাইজীক — তা পীংদি। ইকঅ নাইদি নক কীপীলীং পুনখি। ইকঅ নাইদি ছাই
লাদাক, ইয়াংথেবা পুন লাঁদাক। দগারবু কিচিক কাচাক। চীলা তংগায়বু
কীরীইছুক।

অচাই — চামিরিছংলে তামঅ খাই তংছা? খাচিয়া হিনকে ছীকাগীই রিওয়ানু।
খাচিজাকছি আলিদ্যা মানথগী। রিংহরদি চামারিছংন।

অচাইজীক — নীচামারিবা তালছা ছীকানু নগঅ কিফিলয় থাংখা। তামনি নিনি নুখুংন
রুজ্জুওই তংনাই ছা বরকবা?

অচাই — থাংনাছীকাং তামঅ খুকছামাং ছায়া অং? নুংবছে ছানা তংমানি। আবকি
খগাঁই তংজাকনাই?

অচাইজীক — ‘ননবা তালছা জরা কক ছালাইনাছি লগে মানয়াখু। হর মাথাংমিথিং নগঅ
ফাইথেবু কেফেই মামাংখে ছকফাইও। বাহাই ছানাই? বুফুরুছে ছানাই।

অচাই — ছইনু! কামি কীপীলীং হাময়া চায়া। নকক্রম ক্রম ছামীং বাই ছামীং। ছাবনি
ককন’ নারুকনাই ছাবনিন’ থিবিনাই। ছাবা খাব্রণনি, ছাব ফিকুংনি হনিমানহাই।

অচাইজীক — কুবুই, খীনাখাদে ইয়ংলা?

অচাই — তামঅবা?

অচাইজীক — চকদিরিনি ছাজীক করমতিবা নীং ছীনাময়া হাথাইছি বিথি বরি চারই
হামরিঅ হিনরা?

অচাই — ছাব’ছা আন্তাজই?

অচাইজীক — কামি গুরিওই হাথাইনুছি ছাওই তংগ। তেই হাময়ারগন’ অচাই ইয়াকারাই
বিথি বরি চানা কবগাঁই তংফুন।

অচাই — ‘হিনকে কুবুইফানু অংমানু। ও চেলা বেলাই লাইখা। আংনু থিকানা নাইও
আংনু ছামীং রিঅথে হামরমানি। আবছে মুং নানাই হাথাইছা। মুছুক
বীছান’ আং ইয়াকারয়া। তাবুকনু চকরিনিথানি দরবা রিইছিনাই। কামিনি
ই চীলাছান’ রীখীলাই রহরমানয়া হিনকে আং চীলায়া।

(অচাই নখারখা)

অচাইজীক — কুবু কুবুইদা আ কবরবা দরবা রিনা থাংখাজানি, খা তংথকয়া, বেরাই তং
গগ্রাছিনু।

নুই

॥ ছিকলা যুথাই ॥

চীলা বীরাই ছিকলারগ হাফাইখা। ওলঅ হাথাই হাফাইখা।

হাথাই — নরগ জতনু মুং ছুইনা রীংবাইখা হইয়াদে?

জতনু — আও।

হাথাই — তাবুক তীলীক তীলীক পরিনা ছীরাংনা নাংনাই। বিনি ছীকাং আং তিনি ছাত্রমক্রমনি তংমোং চামীংনি কাহাম রাইদারগন' ছাওই খীনারিওয়ানু। নরগ থা রিওই খীনাবাইদি। নরগ জতনু আইচুক বাচাওই বুয়া ছলাইদি, 'হাখেই মীখাং ছলাইদি। আং নুকখা নরগনি বিছিং বুয়া ছয়াই তংনাইরগবু তংগ। আবঅ চায়া। তেই কক থাইছা অংখা নরগ কে 'ব ইয়াছুক কলকখে তা তনলাইদি। তামহিনবা। ইয়াছুক বিছিং ছীমীক তংখে চাফুরু নুংফুরু আ ছীমীক বহক বিছিং হাবীই অক হাময়া খাইও। পাইথাগঅ ছানা নাইঅ নরগ হাকর খুরীই থি লাইবাইদি।

খরকছা চীলা — হাকরঅ বাহাই থি-নাই? কীলাইছঁয়াদে?

হাথাই — হাকর ছাকাঅ বুফাং বওই নাখে কক কীরাই।

আ-চীলা — হাকরঅখে থি ইমানগীলক দু।

হাথাই — হিনকে বরঅ থি-নাইছা?

আ-চীলা — আংলে নকবারাবারি অছে থি থকজাও।

হাথাই — নকবারাবারি থি-ইমানিখে ছতনাই চায়া। তামহিনবা নকবারাবারি মীনামছানাই। তেই থামপুইরগ থি-ছাকা বাওই নকছিংগ হাবনাই। চাফুরু নুংফুরু চাজাকনাই নুংজাকনাইরগঅ বাফাইনাই। আবরগন' নুং বাহাই চানাই?

আ-চীলা — আবখেইত' চাইমানয়ানু।

হাথাই — এই হিনকে। তাবুক ফাইবাইদি ছিছামুংনি রুচামাংছি তাংছা রাঁচালাইছিনা।
(রুচামীং)

ছিছাদি তাখুক ছিছাদি বুখুক

ছারিই ছাল থাঙমা নাহরদি।

ছারিই ছাল থাংখে চুং কীমানু

ইয়াক বাই ইয়াক রমলাই ছিমদি

তাখুক ইয়াক বাই ইয়াক রমলাই হিমদি।

ছিছাদি তাখুক

(খাঁদল হাফাইখা)

খাঁদল থরাং গুরুং ছারাই — থাক বাইদি।

(জতনু ছিরিং অংবাইখা)

হাথাইছান' চকদিরি নুংহরী। তাবুকনু মা ফাইনাই।

হাথাই — তামনি বাগই?

খাঁদল — নিমুংগাই দরবা রিজাকখা। নিনি বিচার অংনাই।

হাথাই — বিচার? তামনি বিচারছা?

খাঁদল — আছীক ছাইমানয়া। চকদিরি রিংলাহা। তাবুকনু মাথাংনাই। আছুকনু কক। থ হিমছিদি।

হাথাই — নুং হিমছকছিদি। আং ফাইঅ।

খাঁদল — হইয়া। আনি লগেছি মাথাংনাই। দাকতি হিমছিদি।

হাথাই — হিমদি থ। বাইয়ারগ নরগ রুচামীং পাইরই থাংলাইছিদি। আং থাংখা।

(খাঁদল বাই হাথাই নখারখা)

করমতি — বাইয়ারগ! হিমদি চুংব থাংলাইছিनु। কামিনি অত্রারগ দা হাথাইন' তামজানি চাজাকয়া অংলাই তংবাইঅ। আংখে চায়া নুকয়া।

চীলা খরকছা — অত্রারগ যে খায়তুই খায়থুন। চাং ছামীং নাংয়া।

করমতি — নরগ তংলাইদি। আং থাংখা।

বীরাইরগ — নাইছিংদি মারে! চুংবু ফাইঅ।

(জতনু নখারলাইখা)

থাম

।। চকদিরিনি নক।।

চকদির, অচাই, খিগলা তেই কুবনরগ হাফাইখা।

চকদির — তাখুকরগ! কক চেংলাইছিলাদে?

খরকছা — চেংলাই মানখা। তাই ছাব ফায়ছি। নুংথানি চাথানিছিমিছে বরকবা
বাংগ।

তেই খরকছা — বুতুকঅংখেবা নুংজাকনাছি নাংয়াতা হিনঅ।

চকদির — দ লুকুরগ। হিনকে চেংলাইছি।

তেইখরকছা — চেংমানি চাও।

চকদির — দ কা অচাই নি দুখুনি কক ছাফাইছিদি।

অচাই — আনি জবই দুখুনি কক অংখা - আং ওমছীকখে ছাকনু থিকানা নাইও,
ছাকনু ছামাং রিওখে নীছাজীক করমতিন' ছীনামমানিছে হাথাই হীনজাকনাই
টীলাছাছে মাং নানা নাই তংগ। ব কামি গুরিই ছাওই তংগ - আনি ছামাং
বাই হাময়া বিনি বিথি বরি চাওইছে হামঅ। আবছিমিয়া, কামিনি
হাময়ারগন' বছে ছামাং রিয়াই বরি চানানি ফান খায়ওই তংখা। বনি
বাগয় আং লাবু লাচিখা কিবু কিরিখা। লুকুরগ। আ টীলাছান' তামঅ খায়নাই
খাইবাইদি। হাইয়াখে আং ছামাং হমাং রিইমানি মাথাগাই রিনা চংখা।
আছুকনু আনি কক।

চকদির — ককখে বেলাই ওয়ানামাছিংছানু। ব তুমুং আবটাই কক ছাওই তংখাদে
হিনকে পদছায়া পদছা শান্তি রিখাই। তামহিনবা হাময়া চায়ানি বাগয়ছে
অচাই। অচাইনি ছামাংন মাথাকনা নাইখে বাহাই চলিনাই?

খরকছা — টীলাছান' কামিনি রীখীলাই রহরমা চাঅ।

অচাই — খীনা বিছিংগ আ টীলাছান' নখারয়াদে হিনকে আং নখারছিনই।

(খাঁদল বাই হাথাই হাফাইখা)

- খাঁদল — ওলেই, চীলাছান' তুবুখা।
- চকদিরি — হাথাইছা। ইয়াং ফাইগ্রাদি বাবু। (হাথাই চকদিরিনি বীছাকাংগ আচকফাইখা।) নন' কক থাইছা ছীংনাই। নোং লুকুরগনি বীছাকাংগ আ ককনি জরা ছাওই মাখীনারিনাই।
- হাথাই — দ' ছাংদি ইয়াং চকদিরি।
- চকদিরি — নোং কুকুবুইদে করমতিন' বিথি বরি চারই হামরিঅ হিনয় ছাওই তংহিন?
- হাথাই — আও।
- অচাই — নুকখাদে খীনাবাইখাদে ই চেলাছানি ককরাগ।
- চকদিরি — নুং বাহাইথে গছেই মানখা?
- হাথাই — আং যে ছাইজীক বাই পালায়জাকখা, ব অংখা লন্ডন শহরনি খরকছা ডাক্তার কতর। ব বাই তংতে তংতে আংবু কিছা মিছা ছাইমানখা। করমতিনি কুলুম নুগুইনু আং রময় মানখা আবঅ ম্যালেরিয়া বেমার। ম্যালেরিয়ানি বিথি চায়াই আ বেমার হাময়া। আং কুমিল্লা হাথিনি বিথি তুবুই চারইনু করমতি হামঅ। আহাইয়া হিনকে করমতিবু কুবুনরগ হাইথেনু থুইখামনু।
- চকদিরি — বুচিখা। নাইবা নুং চিনি লুকুনি, হদানি রাইদারগন' হামজাকয়া, চা জাকয়া। চুংবু আবন' গছেই নাইমানয়া। বনি বাগয় কামিনি লুকুরগ নন' খীনানি বিছিং কামিনি নখারই রহরনা চংলাইঅ। তবে নুং যদি নিনি চায়ারগন' গছেই অচাইনি থানি তেই লুকুরগনি থানি স্কমা ছানখেবা ওয়ানছগাঁই নাইমানু। নুং তামঅ হিন?
- হাথাই — আং তিনিনু নখারই থাংছিনাই। (থাংখা)
- চকদিরি — হিনকে লুকুরগ তিনি আছুক জরাখে বাচা লাইগ্রাছিনু।

(নখরলাইখা)

ব্রহ্ম

॥ কামিনি লামা ॥

অচাই বাই খিগলা হাফাইখা।

অচাই — বুচিখাদে খিগলা ?

খিগলা — তামবা ?

অচাই — ছুচু বাঁচীলীই কীবাংখে নারুগায় তংগ্রাদি।

খিগলা — তাবুক জরা লাসাথাম পাইখা। তেই বাহান জরাছি তংছিও।

(আজরা খরকছা ছিকলা মামা আনি বাবুলে কীরাইখা। হিনয় ছাওই
কাপতে কাপতে নখারই থাংখা।)

অচাই — দাছং কীরাইখা ? আং ছিঅ ছাব বুথার। আ ছীকালজীকমান' ইয়াকারগা।

(আজরা তেই বীরাই খরকছা হাবাই 'চুচু আনি মালে কীরাইখা' হিনয়
কাপতে কাপতে নখারই থাংখা)

অচাই — তামঅ ? ছাজুকমা কীরাইখা ? খীনাবাইদি কামিনি ছিকলারগ। নিরগ
দাকতি ইয়াং ফায়বাইগ্রাদি।

(চীলা ছিকলা কীথাম হাফাইখা।)

চীলা ছিকলা — তামনিবাং রিংখা চুচু ?

অচাই — (কীলাই তীতাই) — নরগ কামিনি বরক চানাই ছীকালজীকমারগন'
তাবুকনু রমাই তুবুলাইদি। আং মাছা মাছাখে তিয়ারীঅ ককছনাই
বুথারছিনাই।

চীলারগ — বুমুংছে খুছিদি চুচু অচাই। চুং তাবুকনু রমাই তুবুনাই।

অচাই — হাচুক ছাকানি খাজুতি, বিনি বুমা বিয়ালতি তেই রাঁদিজীকমা মীনাকতি।

চীলারগ — থ, তাবুকনু রমাই তুবুলাইনাই।

(থাংলাইখা)

অচাই — হিমদি আচু চুং তিয়ারী ফাইচিং থাংলাইছি।

(থাংখা)

বা

॥ কামিনি লামা ॥

হাথাই কামচালীই কিচিক কাচাক চুনাই হাফাইখা।

হাথাই — মীনাক। থাইছাঁনি হরনি ছলাইবু মীনাক। তবঅ মীনাক! নন' আং কিরিয়া।
আং ছিও। নীং পহরন' পাইয়া। মাখারী। অ-আনি খাবিছিং থুই তংনাই
ছিকলানি ফান। নীং থুমানি ছিছাওই তীলৌক তীলৌক বাচাছিদি। নীং
জতনি কৌপলাই। আং নন' নাইও নুং বাচাছিদি। নীং বাচাছিদি।

(নখারনা নাইখে করমতি খারাই হাফাইখা)

করমতি নুং! নীং নগঅ থাংগয় তংদি। আং হরঅ বাছ'না নাই তংফুরু
গানারী তা ফাইদি।

করমতি — আং নন' কীমাজাগাইছি ফাইঅ দা হাথাই। নীং আনি খাফাংনি তকছা।
নন' নুকয়ই তংমানয়া আং। নীং মীখাং তা ফিরকদি।

হাথাই — করমতি! আং তাবুক কে'বনি খাফাংনি তকছায়া। আং তাবুক নকবার
কতরছে অংগয় নখারনা নাই তংগ। ইকঅ খীনাডি, আয়াং তামঅজানি
হও হও কাপলাইমা খরাং।

করমতি — অচাইনি ককবাই কামিনি চীলারগ বীরাই কীথামন' ছীকালজীকমা হিনয়
রমাই তিলাং তংলাইও। বরগন' তিয়ারীঅ ককছনাই বুথারলাইনাই।

হাথাই — আবঅ অংগয় মানয়া। বেলাই তংমুং চায়া। আং কাছুনাই। কাছুনাই।

করমতি — আয়াং তা থাংদি দা হাথাই। থাংখে কবর রগবাই বুথারজাকনাই। হিমদি
কুবুন ফাইচিং।

হাথাই — অংগয় মানয়া। আবঅ অংগয় মানয়া। ইকঅ বাছকাংগ নাহরদি ছাল

কাঁবাংমারমাই রুংজাগায় তংমানি কছক কুছুমানি হাথাই। তেই পিরজাগাই
তংখা বিনি মীনাম হাইরগ। ছেমাই তাংগ আং আ-মীনামরগন' নারুকয়া।
তাবুকনু নকবার কতর অংগায় আং বেবাক কবনরই তিলাংনাই। বেবাক
তিলাংনাই। (থাংখা)

করমতি — দাদা নাইছিংদি। নুং নকবার কতর অংখে আংবু ফাইরাং অংগায়মানু।
কিরিয়া। কিরিয়া। (থাংখা)

বাক দক

ছা

॥ কামিনি লামা ॥

চীলা কীথাম তেই বীরাই খরকছা রি চুম কাঁবাগাই খারতে খারতে হাবলাইঅ।

খরকছা চীলা — হামলিয়া! হামলিয়া! কুলুঁকীছা বিছিংছে তেই থি-কাঁবাবু। ছিদা
থারলাইমান' চাছিও।

বীরাই — আনি ফু তাই ছানাই তংরুণ্ড। বাহাই থিবিই থাংছিনি। আফুয়ই (কাপখা)

চীলা — বীছা বুছু কারগ্রদি। ছাক থাংগ্রানাছি কক। হিমদি, দাকতি খারলাইছিনা।
মানজাকখে কীথাই।

তেই খরকছা চীলা — ইকঅ, আয়াং ছাব' নি কাপমান খরাং। হিমছিদি থ।

(বীরাইনি ইয়াক ছওইখার লাইখা)

(লগে লগে চেরাই খরকছা হাফাইখা)

চেরাই — আ আমায়ই অ মা। নীং বিয়াং থাংখা। আনঅ তাঁই রিফাইদি। বেলাই
তাঁই কাংখা। (গেরকখ)

(করমতি বাই হাথাই খারাই হা ফাইখা)

করমতিনি ইয়াকঅ বিথিনি ব্যাগ

হাথাই — ইকঅ চেরাই খাতুংরাই। মা-ফারগ থিবিই খারলাইখা। করমতি, ব্যাগনি
বিথি কলনুই চারগ্রাদি।

(করমতি ব্যাগনি বিধি করিই চারিখা)

করমতি — থাংছকদি ফু। নগঅ রকই তংছিদি। চুং ফাইঅ। (চরাই মা-মা নখারখা)

(আজরা বীরাই ছিকলা মাছা হাফাইখা)

ছিকলী — বাবুয়ই, আনঅ ইয়াকারাই তা থাংদি। আং থুইনানইখা। (গেরকখা)

হাথাই — (ইয়াক রমই) - অমঅবা ছামফারী ছিরা। ইস হামলিয়া। ব্যাগ তুবুগ্রাদি।

করমতি — ইকঅ ব্যাগ।

হাথাই (ব্যাগনি ইনজেকশান কারিওই রিতীতাই) - তাওয়ানাদি - হামওয়ানু।

করমতি — মারে তীলীক তীলীক নগঅ হিমছকছিদি। চুং ফাইঅ। (ছামকারী নখারখা)

দা হাথাই হিমিদি চুংবু খারলাইছি। কামিঅ বরক কারাইখা।

হাথাই - (জলিজাগাই) — করমতি। তাবুক ই কক ছানা জরায়। চুং খারখে বেবাক হাময়ারগ থাইবাইনাই। নুং নাইয়াদে নি তাখুক কাহাম বুখক কাহামরগ থাংবাইথুন? বরগন' মীথাংনা মুচকয়া? আং ছিও ই হাময়ারগন' বেবাক মীথাংমানখু।

করমতি — অরঅ তংখে চুংবছে থুইনাই দা হাথাই। নাইনাবা কিরিজাগাই বেবাক খারবাইখা।

হাথাই — খীনাদি করমতি! যে থিথর ব খারঅ। ব' বরকন' মীথাংনা মানয়া। নুং থিথর। নুং খারদি। করমতি নরগ জতনু খারবাইদি। (থাংনা নাইখা)

করমতি — আং করঅ খা দা হাথাই। আং করঅখা। আনঅ মাপ খায়ছিদি।

হাথাই — হিমদি থ' আয়াং হও হও খরাং বাই। (হাথাই খারইন খারখা)

করমতি — আংবা তামঅ অংখা। আনি বীখা বিছিংগ বা ছাব' হর মীছীংগায় রিখা? ইকঅ দা হাথাই বয়ার কতর থাংতাইখে নখারাই থাংখা। দা হাথাই নাইছিংদি দা হাথাই। (খারই নখারখা)

নুই

(অচাই বাই খিগলা হাফাইখা। বরগ খারই হাফাইখা।)

অচাই — ‘তামঅ আছীক লেরলাই তংখা, নাহরলে খিগলা?’

খিগলা — ওলেই ফাইবাইখা।

(চালা কীখামরগ বারাই কীখামন’ ইয়াক খাগাই তুবুই হাফাইখা)

অচাই — দ’মাছা মাছাখে তুবুবাইছিদি।

(মাছা মাছাখে তুবুখে অচাই ছুতু বাঁচীলাই ছারাই কীপালঅ সিঁদুর ফুলোই
রিবাইখা) ওংখা তাবুক ইয়াকুং খাওই তিয়ারীঅ ককছনাই রিলাইছিদি।
দাকতি খায়লাইদি। নখা ছমাছামা বেলাই।

বারাইরগ — অ বাবুরগ। চাং ছীকালয়া-মীতাইয়া। চাংন’ ইয়াকারই রহরদি। ইয়াকুং
রমাই খুলুমজাগঅ।

অচাই — দাকতি তিলাংগায় থাংবাইছিদি শনি বারাইরগন’।

চালায়গ — হিমবাইদি, ছীকালজীকমারগ। (থাংলাইখা)

খিগলা — চুচু কামিনি বরকরগ বেবাক খারবাইখা।

অচাই — নখা ছমছামানিছে নাহরদি। ইকঅ ফাইরাংছি ককখা। হিমদি নগঅ থাং
লাইমানছি চাছিও।

খিগলা — আংখে কামি ইয়াকারইছে খারছিনাই। নিনি ছুচু বাঁচীলাইন’ পুইতু
চাইমানলিয়া।

অচাই — আংবু খারছিনাইনু। ওলেই ফাইরাংছি তেই ফুংছা। (খারই থাংলাইখা)

থাম

।। কামিনি লামা।।

অচাই খারই হাফাইখা, লগে লগে অচাইজীক রাঁকফেরেই ফাইখা।

অচাইজীক — অ ইয়ংলা। আনঅ খিবিই তা থাংজাদি। নুং আনঅ কীখাংনু ছগাই কীলাং

ছিদি। অঃ অঃ।

অচাই — ওমামা-আহইয়া। নুং খি-কীবা মানজাক। আং নন' নাইমানলিয়া। ছিদা
খা-ছি খারছিনাই। (অচাই-খারনা নাইখা)

অচাইজীক — অ-গরনতিফা। আংলে নন' ইয়াকারই ছাইচুংখে থুইনা মুচুকা। (দাং
বাইঅ চলইখা)

অচাই (দাংবাই ছ'তীতাই)— ইয়াকারদি ইয়াকারদি।

(লাথিব রওই) থাইছিদি ছারাম জাতি।

অচাই খারই থাংখা)

(হাথাই বাই করমতি খারই হাফাইখা)

হাথাই — অমবা অচাইজীকছিন্না। ইয়ংক্রই অ ইয়ংক্রই। করমতি নুং ই বিথিন'
চারছকদি। আং তিয়ারী ফাইচিং থাংগায় নাইগ্রানু। (থাংখা)

করমতি — দ নানা ই বিথিন' চাগ্রাদি।

অচাইজীক — করমতি মা নুং। (বিথি চাখা) নিনি চুচু আনঅ লাথি রওই কীলাংগ। আং
ছাইচুংখে মা থুইনাইখা।

করমতি — থুইয়া। হামনাইখা।

(হাথাই হাফাইখা)

হাথাই — হিমছিদি করমতি বুরিন' তুইওই। আং বারাই কীথামন' তিয়ারীনি
তিছাওই কাবখা। বরগনি রাংমা তংবাইখু। থাংনা আশা তংখু। আং বরগন'
তুবুই ফাইছিনা। (থাংখা)

অচাইজীক — ছাবঅ অংখা আবঅ?

করমতি — দা হাথাই! থ' নগঅ তুনাই রিইছিনা। (থাংলাইখা)

ব্রুই

॥ চকদিরিনি নক।।

চকদিরি তেই কামিনি বরকরগ হাফাইখা।

চকদিরি — মীতাইনি জারিই কামিনি হাময়ারগ হামবাইজা খাবা তাবুকলে কামিনি
জতননু কিফিলনা কাঁচারবাইছিদি।

অচাইজীক — হাথাই বাই করমতি কীরাই হিনকে কামি পাইছুকখা। বরগ কীর্নাই
বরকলিয়া মীতাইছি মাহিননাই।

জতনু — আও ককখে ছইনু।

চকদিরি — করমতি বা বিয়াং থাংখাজানি ছাইছিমানলিয়া। লুকুরগ কিছা নাইতুক
চুবাজাবাইগ্রাদি।

জতনু — হিমবাইদি থ। (থাংলাইখা)

বা

॥ কামি দাইকাং ॥

করমতি বাই হাথাই হাফাইখা।

করমতি — কামিনি বরকরগ কিফিলবাইখা। থ' চুংব থাংলাইছি।

হাথাই — নুং থাংদি।

করমতি — নুংলে?

হাথাই — আংকামিনি রাঁখীলাইজাক। নুং ছিয়া হাইদা?

করমতি — আংবু নন' ইয়াকারই থাংয়া।

হাথাই — হিনকে তংদি। বদংবিছিং থামপুই ওয়ারজাগই। অক বাকচা খায়ওই।

করমতি — নুংখে বুজি ওয়ারজাকয়া নুংখে অখুইয়া? আং ছিওকামিনি বরকরগ
বরগনি চায়া বুচিবাইখা। বরগ নন' মীতাই হাইখে নুকবাইও। বরগ নন'
নাইনানি মকল লগাই তংবাইও।

হাথাই — আং নিনি ককবাই থাংমানয়া।

করমতি — ছাবনি ককবাই থাংনাইছা?

হাথাই — রাইদাতুই লুকুনি অংগায় চকদিরিহিননা নাংনাই।

(অক্ৰা চকদিরি, কামিনি বরকরগ খারাই হাফাইখা)

- অক্ৰা — ‘চকদিরিয়া, চকদিরিয়া! আং হদা অক্ৰাছি কবক ফাইঅ। বাবু হাথাই।
নুং তাওয়াইছা কামিনি বরকরগনি চায়ারগন’ পগাঁই লুকুন’ বাঁছাগ্রাছিদি।
হিমছিদি থ’ চকদিরি নগঅ।
- হাথাই — আনি নক কীরাই। চকদিরিনি নকবু আনি নকয়া। আনি কে’ব কীরাই।
- অক্ৰা — বাবু হাথাই। নিনি নক কীরাই ছইনু। তাম হিনবা নুং নকছি নায়াখু। হিমবা,
আবঅ নিনি ওয়াছকনা ককয়া। আং হদা অক্ৰাছি ওয়ানছগাঁই তংগ।
- চকদিরি — বাবু হাথাই। আনি নকথে নিনিবু নকনু। মা করমতি হাথাইন’ লগেথে
হিমছকছিদি। চীং ফাইঅ।
- করমতি — হিমছিদি থ। (করমতি বাই হাথাই থাংলাইখা)
- চকদিরি — আং আইগেছিমিছে হামজাগাঁই তংমানি। আবছে কা অচাইনি খা-
নারকনা থাংগয় তেই লুকুরগনি মাখাং নাহারাই কামিনি নখারই মারহরী।
- অক্ৰা — বুচিখা চকদিরি। লাইওই থাংমা ককন’ কারাই তাবুকনি জরাঅ তোমা
খায়থাই আবছে ছলাইছিনা।
- চকদিরি — ছইনু।
- অক্ৰা — হিনকে, নুংবা নীছাজীকনি ককন’ ওয়ানছগাঁই নাইখাদে? নীং ছইখেবা
হাথাইবাই বেদকলাইখে তামঅ অং?
- চকদিরি — আংবা মুচকমানিছে দুগাঁই তংখা দা অক্ৰা! খুক পেরনাই কীরাইনিছি
ছিরিংথে মা তংখা।
- অক্ৰা — হিনকে তেই তামনি লেরই তংলাইছিনি? দলাইমানিছে চাও।
- চকদিরি — আংছি মুচকমা তুইতুং কাঁছমানছুক অংগয় তংখা। হিমছিদি থ। নগঅ থাংগই
ককছি ছাচুছকলাইছি।
- অক্ৰা — হিমদি থ। (নখারলাইখা)
- চকদিরি — গরালে চমজাকদে তং ছিদু।

দক

॥ বলংনি লামা ॥

হাথাই বাই করমতি হাফাইখা।

করমতি — ‘আংলে নন’ চিনি নগঅ চামারি তংরনা মুচুকয়া।

হাথাই — তাম হিনয়?

করমতি — আনি আমা খেচিরিমা। নীং দুখু মানাই।

হাথাই — হিনকে তামঅ খায়ছিনাই?

করমতি — পানদা পাইমা লগেলগে চামারি ফিরকদি। নরগনি নগঅ তংলাইছিনা।

হাথাই — ছইও। আইনি মাবু কাহাম। ডাক্তার কতর। রাং রি কীবাংমা। চাথাই নুং
থাই আলিদ্যা।

করমতি — এই হিনকে, চাছুকখা।

হাথাই — আবঅ ছিমিয়া।

করমতি — তেই তামরগ তংখু। দাকতি ছানাবা?

হাথাই — ছামাং হমাংবু তাংনা নাংয়া।

করমতি — ওমাযুই হুকবা হাকবার কীরাই হাইদা?

হাথাই — কীরাই। মাইমি ছুংনাইছিমি মাই খুরাই চারনাই জরা বরক তংগী।

করমতি — হিনকে চাছুকখা। চাছুকখা।

হাথাই — চায়াবু কিছা তংগু।

করমতি — তংখুন কিছা সিমছা চায়াবরগ।

হাথাই — দ’ খীনাওই নাগ্রানাবা।

করমতি — দ’ ছাদি। তামঅ চায়া।

হাথাই — কক-বরক মাছায়া।

- করমতি — কক বরক মাছায়া? হিনকে তাম কক মাছানাইছা?
- হাথাই — ইংরাজী।
- করমতি — ইংরাজী? আবঅ বাহাই?
- হাথাই — রমদি। তাঁইন' তাই মাহিনয়া। মাহিমনাই ওয়াটার।
- করমতি — ওমাযুই। তাঁইন ওয়ানালদে হিন ওয়াতলকদে হিনছি মাহিননাইফু। ইহঁ।
আবঅ চায়াখু।
- হাথাই — চামানি বাহাই?
- করমতি — কক মানয়াখে তংনাই।
- হাথাই — থারবাই তংছিনাই হাইদে?
- করমতি — আও। বেবাকছি খায়না ইয়গু হিনকে তামনি ককলে ছাওই তংছিনি। আং
থার খাইখে নুং মাছাছিনাই।
- হাথাই — হিনকে দ' থারখে ফুনুকদি। আং মাই চানাই।
(করমতি থারখে ফুনুকখা) আং তাঁই নুংনাই। (করমতি থারখে ফুনুকখা)
চাখা। হিমবা, নিমুং ছাঁংজাকখে তামহিনা ছানাই?
- করমতি — করমতি।
- হাথাই — চায়াথু, থারবাইছি ফুনুকাদি। খুক মা পেরয়া।
- করমতি — বুচিখা কছমতি হিনায়ছে ছানা তংমানি।
- হাথাই — চায়াখু।
- করমতি — হিনকে থাংলিয়া নরগনি নগঅ। চামারিনু তংছিদি।
- হাথাই — নিমাবাই আং দুখু রিজাকয়াদে?
- করমতি — রিজাকয়া। মা বেলাইছে কাহাম। ইকঅ বাবুছং ফাইলাইখা। হিমছিদি থ।
(থাংলাইখা)

ছিনি

॥ অচাইনি নক ॥

অচাইজীক দুমা নুংতে নুংতে হাফাইখা। অচাইজীক আচকখে অচাই
হাফাইখা। অচাইন' নুকখে অচাইজীক মাথাং ফিরগীয় অতককিখা।
অচাই গানারঅ আচকফাইখে অচাইজীক কনরীই থাংখা।

অচাই — জদি জলিলাং নাইথকতি মা ?

অচাইজীক — পদে পগলাং থাইছিদিহিন লাথি রিওই কীলাংমানি।

অচাই — বুফুরু ? ও ছীকাংনি ককদে ? নীং বেজুয়া বুচিখা। হিন বিরি নুংগ্রাদি।

অচাইজীক — কনরদি মায়াছারা !

অচাই — আংদে মায়াছারা ?

অচাইজীক — হাইয়াখে বাহাই ইয়াকারীই থাংমান ?

অচাই — আং ছাইচুংদে থাংবা ? কামিনি জতমু থাংয়াদে ?

অচাইজীক — হাথাই বাই করমতিলে থাংয়ান্না।

অচাই — বরগ বরক জুদা। বরগহাই খরকবীছোক তং ?

অচাইজীক — নুংবা আনঅ তিরাত্রিছুদুছি রিই পাইখা হিনন্না ?

অচাই — আও। তমহিনবা, নীং কীরীইখা হিনয় ছাইনাই ছাইখা। হিমবা আং
কাপমাং কাপমাংছি মা তংখা নাইথকতি মা। আরাক কীপ্রা কীপ্রা নুং
গায়ছি পগায় মাংতংছিও। (পুছিনি হাফাইখা)

পুছিনি — নানা চুচু। নিরগ করমতিনি কাইলাইবাড়ীঅ তাবুকনু ফায়লাইছিদি। জতঅ
নাইছিংগায় তংলাইখা।

অচাই — আও ফাইঅ।

পুছিনি — চুচু ছামীং মারিনাই নানা জগা মালুনাই। দাকতি ফায়লায়ছিদি।

অচাইজীক — ফাইঅ - হিমছিদি ইয়ংলা ।

অচাই — (বিহিকন কীবাগাঁই কাপখা) - অ দুখু-দুখু ।

চার

কাইলাই পানদা

॥ কামিনি লামা ॥

অচাই বাই অচাইজীক হাবলাইখা ।

অচাইজীক — পানদানি মাইমুই থকবাইখা ।

অচাই — আংখে শিংগি বুছুছে কীচাজাগাঁই তংথকয়া অংগাঁই তংখা ।

অচাইজীক — ওয়াফেই চায়া, ছিদা মনকখানাতা হিনঅ ।

অচাই — কুতুংমানি ওয়াফেই মানলিয়া । মনগাঁই রিজাকখা ।

অচাইজীক — মছক বাহাঁ কীরানলে চালিয়াদেবা ?

অচাই — বনছিমি ওয়াইবা নাওই চাখা । (খিগলা খারই হাফাইখা)

খিগলা — চুচু অ চুচু ।

অচাই — ছাবঅ । খিগলাদা ?

খিগলা — আও চুচু । আং নন' বেলই ছামাং নাংজাগাঁই মাতংখা ।

অচাই — আংছি জবাই নন' নাইছিংগই মা তংখা । দ আচকগ্রাদি । ফাইদি, নিনি গামছা, বুচুন' খেংলাইগ্রানা ।

খিগলা — আংবু আবন' তুনানিনু ফাইঅ । তাইমাং তাইমাং আকইছুকখা ।

অচাই — দ' খেংছিদি । নাইথকতিমা নুংবু খেংচুবাফাইদি । (খেংলাইখা)

দদি, পাল পালখে তাইছাঅ ককছনাই কচকরই রহরলাইছিनु ।

অচাইজীক — হিন, মীনামানেছে নাইলে । ও মামামা । (ককছনাই রিলাইখা)

- অচাই — তাবুকলে হিমদি ইয়াপ্ৰি কীতাল ছেবলাইছিলা।
- খিগলা — বিয়াংবাই চুচু ?
- অক্ৰা — (খারতে খারতে) - লাং লাং ফায়চিং। (চিকদিরি, হাথাই, করমতি তেই ছিকলা ছিকলিরগ খারই হাফাইখা) হিমবাইদি জতঅ দফানি বরকরগা, বীরাই চেরাইরগ। মীনা কনি নখারই লাং লাং ফায়চিং ইয়াপ্ৰি ছেবলাইবাইছিলা।
- চকদিরি — হিমবাইদি থ। (নখারই থাং বাইখা)
- অচাই — হিমদিবা নাইথকতিমা। চুং ওনকলগ' কীলাইওই তংরুলাইখা।
- অচাইজীক — আংবা ইয়াকুং জরাছি ছাজাগাঁই তংখান্না।
- অচাই — আবখেইদে হামছি। থ' বামাই তীইছি। (বামাই তিলাংখা)

পাইখা।

